



ԱՄԵՆԱՅՆ ՀԱՅՈՑ ԿԱԹՈՂԻԿՈՍ Տ. Տ. ՎԱԶԳԵՆ Ա.
ՀԱՅՐԱՊԵՏԻ «ԽՈՍԲԸ ԽԱՂԱՂՈՒԹՅԱՆ ԵՎ ԲԱՐԻ
ԿԱՄԵՑՈՂՈՒԹՅԱՆ», ԱՐՏԱՍԱՆՎԱԾ ՍՈՒՐԲ
ԷԶՄԻԱԾՆԻ ՄԱՅՐ ՏԱՃԱՐՈՒՄ

(1979 թվականի դեկտեմբերի 9-ին և ձայնասփռված Երևանի
ռադիոյից)

Հայ առաքելական եկեղեցին և համայն քրիստոնյա աշխարհը հուսաց-
յալ սրտերով շուտով պիտի ողջունեն մեծ ավետիսը մեր Փրկչի Հիսուս
Քրիստոսի ծննդյան և պատգամը երկնքի՝ «չերկիր խաղաղություն, ի մարդիկ
հանություն»:

Մեր օրերի փոթորկահույզ աշխարհում, հետզհետե ավելի ալժմեական
ու հրամայական է դառնում երկրի վրա կենսագործումը երկնային այս
պատգամի: Մեծ ողբերգություն է համայն մարդկության և նրա ճակատա-
գրի համար հաստատել, թե, ավա՞ղ, դեռևս հեռու, շատ հեռու է այդ երջա-
նիկ օրվա արշալույսը: Եվ ավելին, երբեմն դժբախտ վկաներն ենք լինում
նորանոր ոազմամոլ միջոցառումների և նորանոր սպառագինման ձեռնար-
կումների, որոնք է՛լ ավելի ծանրակշիռ լարվածություն են ստեղծում միջազ-
գային կյանքում, է՛լ ավելի մեծանում է սպառնալիքը համաշխարհային նոր
հրդեհումների:

Շատ տխուր է, այո՛, հաստատել, թե այսպիսի սպառնալիք է հանդի-
սանում վերջերս ծրագրված միջուկային մահաափյուռ նոր զենքերի տեղա-
դրումը Արևմտյան Եվրոպայի մի շարք երկրներում:

Այնպիսի մի պահի, երբ աշխարհի բոլոր մարդիկ տենչում են ազատվել պատերազմի մղձավանջից ու ապրել խաղաղ և անվտանգ, այնպիսի մի պահի, երբ բոլոր քրիստոնյա եկեղեցիներն ու տարբեր կրոնական կազմակերպությունները սրտեռանդն աղոթում են ու գործում վասն խաղաղության համայն աշխարհի, այնպիսի մի պահի, երբ մարդկության խիղճը պահանջում է բոլոր պետություններից՝ դադարեցնել սպառազինությունների մրցավազքը և հասնել ընդհանուր զինաթափման իրականացման, և վերջապես այնպիսի մի պահի, երբ Միացյալ ազգերի կազմակերպությունը գերմարդկային ճիգեր է ի գործ դնում, որպեսզի պետությունների միջև ծագած բոլոր տեսակի անհասկացողություններն ու վեճերը լուծվեն բանակցությունների խաղաղ ու արդար ճանապարհով, համաձայն միջազգային իրավունքով նվիրագործված սկզբունքների, ահավասիկ այսպիսի մի պատմական պահի, մարդիկ և ժողովուրդները մեր աշխարհի, բնականորեն խոր սարսուռ են ապրում՝ լսելով, որ պատրաստություններ են կատարվում ահավոր մոր զենքեր տեղաբաշխելու Արևմտյան Եվրոպայում:

Կարծում ենք, թե հնարավոր չէ հաշտվել մեզնից ծրագրերի գործադրման հետ: Կարծում ենք, մանավանդ, որ առաջին հերթին մենք՝ քրիստոնյա եկեղեցիներս՝ մեր աղերսը, մեր խոսքը լսելի պետք է դարձնենք ամբողջ աշխարհին և հատկապես պետությանց պատասխանատու ղեկավարներին, որպեսզի ետ կանգնեն աշխարհաքանդ մոր սպառազինումներից և գործեն միջազգային լարվածության թուլացման ի խնդիր, որպեսզի ի վերջո բացվի ճանապարհը ընդհանուր զինաթափման:

Մենք տարակույս չունենք, թե այս հրամայականների կենսագործումը սրբազան իղձն է հանդիսանում աշխարհի բոլոր ժողովուրդների անխտիր: Հետևաբար, բոլոր բարի կամքի տեր մարդիկ, բոլոր եկեղեցիներն ու հավատացյալները բոլոր երկրներից պետք է մի սրբազան դաշինք կնքեն, պաշտպանելու համար պետությանց խաղաղ գոյակցության փրկարար գաղափարը, պաշտպանելու համար անվտանգ ապրելու աստվածատուր իրավունքը մարդկանց ու ժողովուրդների:

Մենք՝ Հայրապետը հայ առաքելական եկեղեցու, Մեր սույն խոսքն ու կոչն ենք ուղղում մեր ժողովրդի զավակներին, մեր եկեղեցու նվիրապետական Աթոռներին ու հայ հոգևորականությանը, մեր քույր եկեղեցիներին և պետությանց ղեկավարներին, թելադրված մեր Տիրոջ Քրիստոսի Ավետարանի պատգամներից և մեր եկեղեցու ու ժողովրդի երկար դարերի տառապալից փորձառությունից և մանավանդ 1915-ի ցեղասպանության ու երկրորդ համաշխարհային պատերազմի ահավոր ողբերգություններից:

Հայ եկեղեցին և համայն հայ ժողովուրդը որ ի Հայաստան և որ ի ափսոսա աշխարհի, իրենց ճակատագիրը, իրենց ներկա կյանքի անվտանգությունը և ապագա արդար երազանքների իրականացումը կապել են աշխարհի խաղաղ գոյավիճակի հետ, «չերկիր խաղաղութիւն, ի մարդիկ հաճութիւն» քրիստոնեական իդեալի կենսագործման հետ:

Հայ եկեղեցու և ժողովրդի երկհազարամյա հավատամքն ու երազանքն է եղել տեսիլքը մեծ սաղմոսերգուի՝

«Ողորմությունը և ճշմարտությունը պիտի գրկախառնվեն, արդարությունը և խաղաղությունը պիտի համբուրվեն».

